



Broj: 01,02,03,03/11-05-1-2739/25

01,02,03,03/11-05-1-67/26

Sarajevo, 5. 3. 2026.

**KOLEGIJ PREDSTAVNIČKOG DOMA PSBiH
KOLEGIJ DOMA NARODA PSBiH
KOLEGIJ SEKRETARIJATA**

Predmet: Izvještaj s Međuparlamentarne konferencije o stabilnosti, ekonomskoj koordinaciji i upravljanju u EU, Brisel, 23. i 24. februar 2026. i Konferencije predsjednika parlamenata država Jugoistočne Evrope, Budimpešta, 26. i 27. februar 2026.

Predsjedavajući Predstavničkog doma Parlamentarne skupštine Bosne i Hercegovine Marinko Čavara učestvovao je u periodu od 23. do 27. februara na međunarodnim parlamentarnim skupovima održanim u Briselu i Budimpešti.

Tokom službenog putovanja predsjedavajući je učestvovao na Evropskoj parlamentarnoj sedmici u organizaciji Evropskog parlamenta, kao i na 12. konferenciji predsjednika parlamenata zemalja Jugoistočne Evrope u Budimpešti.

Cilj učešća na ovim skupovima bio je razmjena mišljenja o ključnim pitanjima evropske ekonomske politike, budžetskih prioriteta i procesa proširenja Evropske unije, kao i jačanje parlamentarne saradnje i regionalnog dijaloga zemalja Jugoistočne Evrope.

Aktivnosti u Briselu (23. i 24. februar)

Predsjedavajući Čavara učestvovao je u radu Evropske parlamentarne sedmice, koja okuplja poslanike nacionalnih parlamenata država članica Evropske unije, zemalja kandidatkinja i poslanike Evropskog parlamenta.

Ovogodišnji skup organizirali su Evropski parlament i Predstavnički dom Parlamenta Republike Kipar u okviru kiparskog predsjedavanja Vijećem Evropske unije.

U uvodnom dijelu skupa učesnicima su se obratile predsjednica Evropskog parlamenta Roberta Metsola i predsjednica Predstavničkog doma Parlamenta Kipra Annita Demetriou, naglasivši važnost demokratske odgovornosti, stabilnosti i jačanja parlamentarne saradnje u oblikovanju evropskih politika.

Tokom konferencije vođene su rasprave o ekonomskom smjeru Evropske unije, budžetskim prioritetima i socijalnim politikama, uz poseban fokus na budući višegodišnji finansijski okvir Evropske unije kao instrument jačanja otpornosti tržišta rada, socijalne kohezije i strateške autonomije Evrope.

Također je istaknuta potreba stvaranja poticajnog poslovnog okruženja unutar jedinstvenog tržišta kroz inovacije, investicije i pametnu regulaciju koja doprinosi jačanju konkurentnosti i otvaranju održivih radnih mjesta.

Predsjedavajući Čavara učestvovao je i na sastanku političke grupe Evropske narodne stranke (EPP), gdje su razmatrani aktuelni izazovi u oblasti ekonomskog razvoja, stabilnosti i socijalne sigurnosti u Evropi.

Posjeta Ambasadi Bosne i Hercegovine u Budimpešti (25. februar)

U okviru posjete Mađarskoj, predsjedavajući Čavara i predsjedavajući Doma naroda Parlamentarne skupštine Bosne i Hercegovine Kemal Ademović posjetili su Ambasadu Bosne i Hercegovine u Budimpešti.

Tom prilikom razgovarali su s ambasadoricom Bosne i Hercegovine u Mađarskoj Biljanom Gutić-Bjelicom o aktuelnoj političkoj i ekonomskoj situaciji u Bosni i Hercegovini i Mađarskoj, kao i o aktivnostima Ambasade usmjerenim na razvoj bilateralnih odnosa dvije zemlje.

Posebno je istaknuta uloga Mađarske kao jedne od država članica Evropske unije koja snažno podržava proces proširenja Evropske unije na zemlje Zapadnog Balkana.

Konferencija predsjednika parlamenata zemalja Jugoistočne Evrope (26. i 27. februar)

Predsjedavajući Čavara učestvovao je na 12. konferenciji predsjednika parlamenata zemalja Jugoistočne Evrope u Budimpešti, koja je održana na poziv predsjednika Narodne skupštine Mađarske Lászla Kövéra.

Konferenciju je otvorio predsjednik mađarskog parlamenta Kövér, dok se učesnicima u uvodnom dijelu obratio i predsjednik Vlade Mađarske Viktor Orbán.

Na konferenciji su učestvovali predsjednici parlamenata zemalja Jugoistočne Evrope, kao i predstavnici država članica Višegradske grupe. Centralne teme skupa odnosile su se na proces proširenja Evropske unije na Jugoistočnu Evropu i na Ekonomski i investicioni plan za Zapadni Balkan.

U okviru tematske rasprave predsjedavajući Čavara naglasio je kako bez stabilnih i dugoročnih izvora finansiranja nema ni stvarne integracije regiona u evropski prostor. Posebno je istaknuo važnost ulaganja u infrastrukturno povezivanje, energetska sigurnost i podršku malim i srednjim preduzećima.

Također je naglasio da je za zadržavanje mladih u regionu potrebno osigurati stabilnost, nova radna mjesta i jasnu evropsku perspektivu te da reformske procese mora pratiti konkretna i osigurana podrška Evropske unije.

Na kraju konferencije učesnici su usaglasili Budimpeštansku parlamentarnu izjavu o evropskoj integraciji Jugoistočne Evrope, kojom je potvrđena opredijeljenost za ubrzanje procesa proširenja Evropske unije uz poštovanje principa zasluga i jednakog tretmana svih zemalja kandidatkinja.

U Izjavi je također naglašena važnost jačanja demokratskih institucija i parlamentarne saradnje, kao i potreba očuvanja vjerodostojnosti pristupnog procesa i definiranja jasnog vremenskog okvira za najnaprednije partnere u procesu integracije.

Predsjedavajući Predstavničkog doma PSBiH Marinko Čavara održao je i bilateralni sastanak s predsjednikom Narodne skupštine Mađarske Lászlom Kövérom.

U razgovoru je naglašena važnost daljnjeg jačanja bilateralnih odnosa između Bosne i Hercegovine i Mađarske, posebno u oblasti privredne saradnje, kao i nastavka podrške evropskom putu Bosne i Hercegovine. Sagovornici su istaknuli da je proširenje Evropske unije na zemlje Jugoistočne Evrope od strateškog značaja za stabilnost i razvoj regiona te potvrdili spremnost za daljnje jačanje političkog dijaloga i saradnje.

Učešće predsjedavajućeg Predstavničkog doma Parlamentarne skupštine Bosne i Hercegovine na međunarodnim parlamentarnim skupovima u Briselu i Budimpešti doprinijelo je jačanju parlamentarne diplomatije Bosne i Hercegovine i afirmaciji njenog evropskog puta.

Razgovori vođeni tokom konferencija i bilateralnih susreta potvrdili su značaj nastavka reformskih procesa u Bosni i Hercegovini, ali i potrebu snažnije podrške Evropske unije procesu proširenja na zemlje Zapadnog Balkana.

Službeno putovanje također je doprinijelo daljnjem jačanju bilateralnih odnosa Bosne i Hercegovine i Mađarske te unapređenju regionalne saradnje među zemljama Jugoistočne Evrope.

Izvještaj odobrio

Marinko Čavara
Predsjedavajući
PDPSBiH

Izvještaj pripremila

Olja Golijanin

Dostaviti:

- naslovu
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Ministarstvu vanjskih poslova BiH
- Sektoru za međunarodne odnose i protokol
- a/a